


Minister Otmar Oduber sumamente contento cu desaroyo rapido di Linear Park Fase 2



ORANJESTAD (AAN): Den cuadro di e mehoracion di Producto Aruba, Minister di Turismo, Transporte y Labor Otmar Oduber su vision tabata semper pa mehora e promer impresion cu nos bishitantenan ta haya na momento nan ta yega nos isla. Depsues di exito cu Linear Park fase 1 a cosecha den comunidad completo, ya caba por nota un adelanto grandi den e trabaonan tumando lugar cu e 2^o fase.

Minister Oduber ta indica cu despues di e experiencia di fase


uno, a siña hopi pa asina simplifica esaki y haci di e di dos proyecto 'Linear Park fase 2' uno hopi mihor.

Ya caba por nota e beyeza di e di dos fase. Mirando e rapididad cu fase dos ta bayendo, ta indicacion di e impresion bunita cu esaki ta bay tin tanto pa nos bishitantenan como nos hendenan mes. Sigur creando un efecto positivo riba nos comunidad. E mandatario ta remarca cu si e proyecto aki sigui cana manera e ta bayendo, por conta cu Linear Park fase 2 lo logra

worde entrega prome cu e fecha stipula.

Linear Park ta den su totalidad un inversion cu a worde haci for di e Fondonan di Producto Aruba (TPEF). Un biaha mas esaki ta demostra cu un fondo cu nunca antes Gobierno tabatin, unda por medio di e timeshare association a logra haya contribucion di e doñonan di timeshare ta contribui na e adelantonan cu ta worde mira rond, pa e mehoracion di Producto Aruba.

E proceso di e promer fase no tabata uno facil, a haya diferente contratiemponan mara na diferente factornan, manera ta cabelnan di coriente, awa y tuberia, contratiemponan cu a presenta den e di dos fase. a Tambe mester tuma na cuenta cu e prome fase di Linear Park a conta cu un estetica diferente cu ta haci cu e fase di construcion no a bay facil, mirando cu mester a crea Plaza Turismo. Tur cu tur, Gobierno a siña di e experiencianan cu a tuma lugar



cu e promer fase y a percura pa e di dos etapa di Linear Park cana hopi mihor.

Minister Otmar Oduber ta elogia e contratista pa e trabaonan cu ta tumando lugar actualmente na e di dos fase di Linear Park, como tambe DOW pa e control cu tin riba e proyecto aki.

Como Arubiano nos por ta orguyoso na momento nos pasa banda di e Linear Park fase 2, mas aun mirando e bista bunita cu ta worde crea pa cada un ciudadano na Aruba, e mandatario ta duna di conoce.

Minister Oduber a elabora poco tambe riba e proyecto entre fase uno y fase dos di Linear Park, cu ta e parti dialnti Cas di Cultura bay te na Surfside Beach cual tambe lo worde desaroya y cu lo tuma lugar danki na e fondonan di FDA.

Si mira Linear Park den su totalidad, esaki lo ta sigur un proyecto cu lo contribui na e embebecimento di nos isla como tambe e lo yuda eleva e calidad di bida di cada un ciudadano.